

■ COLUMNA

Digigigagaziun

DA MARTIN CANTIENI*

Prolog: L'impurtant a l'entschatta. I va vers la fin. Cun il virus. Sperain nus tuts. Danor ils columnists ch'han scrit columnas u glossinas coronalas mai publitgadas. Perquai: Segir è segur. Inoltrar ussa. Il medem vala per prelecziuns en cuschina. I fa prescha!



Videolog: Ti es artist ed i dat ina pandemia? Las exposiziuns, ils concerts, las preschentaziuns annulladas? Betg resignar! Daventa creativ! Dumonda: Tge ideas ha la la gliueda teater? Resposta: Igl è halt da daventar creativ. Ti es scriptur e tut las prelecziuns stritgadas? I dat per franc ina soluziun creativa! Ins sto mo profitar dals avantatgs da la digitalisaziun. Cun in zichel creativad digitala-virtuala es ti back in business!

Sche tanta creativad concentrada na dat betg in stausch a l'entir pajais! Tut la branscha creativa dischoccupada daventa anc pli creativa e chatta soluziuns creativas. Inspirada da la situaziun singulara, animada da furnir creativad extraordinaria! I dovra be duas ingredienzas: Creativad e digitalisaziun!

Ti lavuras en la branscha da medias? Qua èn dumandadas soluziuns innovativas! Co divertir il public? Tut las mammas e tut ils babs sfurzads da re-

star a chasa cun trais uffants e condemnads a lungurella infinita. Tge far? I dovra insatge nov. Ina soluziun innovativa, virtuala e creativa!

Ti es scolast u professura u das in curs da lingua? Dir giu tut? U simpla-main tschertgar... Vos sminais: I dovra ina soluziun creativa!

Etge è il resultat da tut questa creativad? Video.

Concerts ord stivas senza fin. Prelecziuns ord stivas e bargias e verandas d'enviern. Videoprelecziuns e sesidas da video. (Audas? Gea? Audas? Ti stos smatgar sin quel purtret cun il microfon stritgà tras. Là, sut la fanestra.)

Ils ignorants e quels che s'impipan davant paraids alvas, ils intellectuals e superbis davant curunadas da cudeschs. Ils babs dals 14 da zercladur e las famiglias senza daners davant la maisa da far sitg. Quels betg disads èn da vesair mo dal

nas ensi u dal nas engiu. E lura datti anc quels che chavan il nas perquai ch'els na san betg ch'ins po vesair els era sch'els na vesan betg sasez. E quels cun abunaments per 75 francs cun HD, quels cun ils mirs lads cun 3x4 pixels. Quels cun il mail mors senza cha-pientscha ch'i dat gliued senza Facetime.

Tut quai po capitar sche la creativad dal mez mund e la digitalisaziun s'uneschan: in video via internet!

Epidemiolog: Nus engraziain a tut las musicistas ch'han mussà lur stiva, a tut ils scripturs ch'han mussà lur biro ed a tut ils educaturs ch'han tradì ils titels da lur cudeschs exponids en il fund davos! Nus engraziain a tut las organisaturas ed a tut quels che fan insatge cun medias per avair persvas musicists ed artistas e scripturas dad exponer lur cuschinas, abitaziuns e balcuns – squisit e gratuit. Grazia!

Enus tuts faschain ina pitschna pausa da meditaziun, commemoraziun ed aduraziun. Per la creativad, per la digitalisaziun e per Priit Kasesalu e Jaan Tallinn. Quels han numnadamain publitgà l'emprima versiun da Skype – l'onn 2003. Grazia!

* Martin Cantieni da Sagogn/Turigt è bab e student da filosofia, rumantsch e linguistica da computer.